



---

Број/ Број : 02/2-50-1-23-37/09

Сарајево/ Сарајево: 28.01.2010. године

## ZAPISNIK

### **37. sjednice Komisije za vanjsku i trgovinsku politiku, carine, saobraćaj i komunikacije Doma naroda Parlamentarne skupštine Bosne i Hercegovine, održane 18.01.2010. godine**

Sjednicu Komisije za vanjsku i trgovinsku politiku, carine, saobraćaj i komunikacije Doma naroda Parlamentarne skupštine BiH (u daljnjem tekstu: Komisija) sazvaо je prvi zamjenik predsjedavajuće Komisije Božo Ljubić, s obzirom na spriječenost predsjedavajuće iz zdravstvenih razloga.

Sjednici Komisije su, u svojstvu članova, prisustvovali: Alma Čolo, Adem Ibrahimpašić, Slobodan Šaraba, Božo Ljubić i Branko Zrno, te Nenad Pandurević, sekretar, i Dobrinka Savić, stručni saradnik u Komisiji. Opravdano odsutna bila je Dušanka Majkić.

Sjednici su, u svojstvu predlagača i izvjestilaca, prisustvovali: Hajrudin Podbičanin, pomoćnik ministra, Zehra Selimović, stručni savjetnik, i Šefika Tutundžić, šef odsjeka u Ministarstvu vanjske trgovine i ekonomskih odnosa BiH, Edin Šehić i Alija Muminović, šefovi odsjeka u Ministarstvu vanjskih poslova BiH, Milanka Sudžum, šef odsjeka, i Senada Čengić, viši stručni saradnik u Ministarstvu komunikacija i prometa BiH, Draženka Malićbegović, pomoćnik ministra civilnih poslova BiH, Mirosljub Krunić, pomoćnik ministra finansija i trezora BiH, Snežana Akulović, savjetnik direktora u Upravi za zaštitu zdravlja bilja BiH, Zdravko Marinković, zamjenik generalnog sekretara, i Igor Gavran, projektmenadžer u Vanjskotrgovinskoj komori BiH, te Zoran Brkić, viši stručni saradnik u Sektoru za odnose s javnošću u PSBiH.

Sjednica Komisije počela je u 14 sati.

Nakon što je konstatirala da postoji kvorum, predsjedavajuća Komisije Alma Čolo predložila je sljedeći

## **D N E V N I R E D**

1. Usvajanje Zapisnika 36. sjednice Komisije;
2. Razmatranje Prijedloga zakona o izmjenama i dopunama Zakona o carinskoj tarifi Bosne i Hercegovine (prva komisijaska faza), predlagač: Vijeće ministara BiH;
3. Razmatranje Prijedloga zakona o zaštiti novih sorti bilja u Bosni i Hercegovini (prva komisijaska faza), predlagač: Vijeće ministara BiH;
4. Razmatranje Prijedloga zakona o izmjenama i dopunama Zakona o politici direktnih stranih ulaganja u Bosni i Hercegovini (prva komisijaska faza), predlagač: Vijeće ministara BiH;
5. Razmatranje davanja saglasnosti za ratificiranje Revidiranog dopunskog sporazuma o pružanju tehničke pomoći od strane Međunarodne organizacije za atomsku energiju (IAEA) Bosni i Hercegovini;
6. Razmatranje davanja saglasnosti za ratificiranje Sporazuma između Vijeća ministara Bosne i Hercegovine i Vlade Savezne Republike Njemačke o finansijskoj saradnji u 2008. godini;
7. Razmatranje davanja saglasnosti za ratificiranje Šestog dodatnog protokola na Ustav Svjetskog poštanskog saveza;
8. Razmatranje informacija Ministarstva vanjskih poslova BiH:
  - Samit Evropske unije – Lisabonski sporazum – kraća analiza;
  - Analiza stavova nekih država članica NATO-a o ulasku Bosne i Hercegovine u Akcioni plan za članstvo u NATO (MAP);
  - Pismo generalnog sekretara NATO-a Andersa Fogha Rasmunssena;
  - Ažurirani pregled ratificiranja Sporazuma o stabilizaciji i pridruživanju sa BiH.
9. Razmatranje izvještaja o međunarodnim aktivnostima komisija i parlamentarnih delegacija PSBiH:
  - Izvještaj Delegacije PSBiH u Vijeću Evrope o učešću na sastanku Komiteta za kulturu, nauku i obrazovanje Parlamentarne skupštine Vijeća Evrope, Pariz, 8.12.2009.
  - Izvještaj Delegacije PSBiH u Parlamentarnoj skupštini NATO-a sa 55. godišnje konferencije Parlamentarne skupštine NATO-a, Edinburg, od 13. do 17.11.2009.
10. Razmatranje Prijedloga izvještaja o radu Komisije za vanjsku i trgovinsku politiku, carine, saobraćaj i komunikacije Doma naroda PSBiH za 2009. godinu;
11. Tekuća pitanja:
  - Informacija Upravnog odbora Radio-televizije BiH o promjenama u poslovdstvu BHRT-a.

*Predloženi dnevni red usvojen je jednoglasno.*

## **Ad. 1. Usvajanje Zapisnika 36. sjednice Komisije**

*Zapisnik 36. sjednice Komisije usvojen je jednoglasno.*

## **Ad. 2. Razmatranje Prijedloga zakona o izmjenama i dopunama Zakona o carinskoj tarifi Bosne i Hercegovina (prva komisijska faza), predlađač: Vijeće ministara BiH**

Predsjedavajuća Komisije Alma Čolo je na početku informirala prisutne da je ovo prva komisijska faza, te da se članovi Komisije danas izjašnjavaju samo o principima predloženog zakona. Dodala je da je Predstavnički dom usvojio Prijedlog zakona u prvom čitanju, na sjednici održanoj 12.1.2010. Naglasila je da je dobiveno Mišljenje Direkcije za evropske integracije u kojem je, između ostalog, navedeno da su za sadržaj prijedloga zakona relevantni Uredba Komisije EZ broj 1214, od 20.9.2009., koja se odnosi na tarifnu i statističku nomenklaturu i zajedničku carinsku tarifu i Privremeni sporazum o trgovini i trgovinskim pitanjima koji je stupio na snagu 1. jula 2008. Dalje je navela da je u mišljenju Direkcije za evropske integracije konstatirano da, nakon provedene analize usklađenosti i poređenja Prijedloga zakona s navedenim izvorima EU, Direkcija zaključuje da je Prijedlog zakona djelimično usklađen s navedenim izvorima komunitarnog prava.

Predsjedavajuća je predložila da se rasprava vodi nakon uvodnog obrazloženja predstavnika resornog ministarstva.

U ime Ministarstva vanjske trgovine i ekonomskih odnosa BiH, obrazloženje je dao Hajrudin Podbičanin, pomoćnik ministra. Istakao je da postoji ustavni osnov za donošenje ovog zakona te da je to i Ustavnopravna komisija Doma naroda PSBiH potvrdila na svojoj sjednici. Naglasio je da je na osnovu Zaključka Predstavničkog doma, od 21.1.2009., i Zaključka Doma naroda, od 29.4.2009., Ministarstvo vanjske trgovine i ekonomskih odnosa BiH, u saradnji s Vanjskotrgovinskom komorom BiH, sačinilo listu prioriternih potreba privrednika iz oblasti tekstilne i metaloprerađivačke industrije i poljoprivrede. Dalje je rekao da su predstavnici Ministarstva spremni da pojasne sve eventualne nejasnoće vezane za Prijedlog izmjena i dopuna ovog zakona.

Adem Ibrahimpašić rekao je da je ranije, prilikom izjašnjavanja o bescarinskom uvozu nerafiniranog šećera, pokrenuta inicijativa da se i ostali proizvodi za koje se kod nas primjenjivala veća carinska stopa izjednače sa stopama u carinskoj tarifi Evropske unije gdje je za iste proizvode primjenjivana niža carinska stopa. Istakao je da se radilo o oko 43 proizvoda. Naveo je primjer „Bire“, te pitao šta sada znači mišljenje Direkcije za evropske integracije u kojem se kaže da je Zakon djelimično usaglašen.

Predsjedavajuća Komisije je, odgovarajući na postavljeno pitanje Adema Ibrahimpašića, istakla da Direkcija za evropske integracije uvijek daje takvo mišljenje jer je naše zakonodavstvo u procesu usklađivanja s pravnom tečevinom EU, tako da je mišljenje uvijek takvo.

Slobodan Šaraba pitao je da li su ovim izmjenama i dopunama Zakona o carinskoj tarifi obuhvaćeni svi zahtjevi koji su upućeni Ministarstvu vanjske trgovine i ekonomskih odnosa BiH.

Šefika Tutundžić, šef Odsjeka za carinsku tarifu Ministarstva vanjske trgovine i ekonomskih odnosa BiH, rekla je da su detaljno obrađeni svi zahtjevi. Naglasila je da je bilo zahtjeva i na nivou državnih i na nivou entitetskih udruženja te je pročitala spisak podnosilaca zahtjeva. Naglasila je da su svi zahtjevi bili u obradi i da su se odnosili na 61 tarifnu oznaku, te da su 33 usvojena kao opravdana i osnovana, s ciljem prilagođavanja stvarnim potrebama proizvođača u BiH i omogućavanja uvoza repromaterijala na nivou stopa kao što su stope u Evropskoj uniji.

Alma Čolo, predsjedavajuća Komisije, osvrnula se na obrazloženje vezano za finansijske efekte, gdje je rečeno da su oni kroz povećanje broja zaposlenih i povećanje izvoza mnogo značajniji od umanjnja prihoda od carina koji će proizaći zbog smanjenja carinskih stopa. Pitala je da li je ovo mišljenje doneseno na osnovu relevantnih pokazatelja, s obzirom na upozoravajuće stavove direktora Uprave za indirektno oporezivanje o drastičnom smanjenju carina i carinskih prihoda. Naglasila je da se ovim zakonom također umanjuju carinski prihodi po određenim proizvodima, te je pozvala predstavnike nadležnog ministarstva da daju svoje mišljenje o ovom pitanju.

Hajrudin Podbičanin, pomoćnik ministra vanjske trgovine i ekonomskih odnosa BiH, rekao je da se radi o relevantnim pokazateljima te da je Uprava za indirektno oporezivanje uradila analizu finansijskih efekata i dala pozitivno mišljenje.

*Nakon provedene rasprave, Komisija je jednoglasno podržala principe Prijedloga zakona o izmjenama i dopunama Zakona o carinskoj tarifi Bosne i Hercegovine.*

Za izvjestioca na sjednici Doma naroda imenovana je Alma Čolo, predsjedavajuća Komisije.

### **Ad. 3. Razmatranje Prijedloga zakona o zaštiti novih sorti bilja u Bosni i Hercegovini (prva komisijska faza), predlagač: Vijeće ministara BiH**

Predsjedavajuća Komisije Alma Čolo naglasila je da se radi o prvoj komisijskoj fazi, te da je predlagač Vijeće ministara BiH, a da je Ustavnopravna komisija dala ocjenu da postoji ustavnopravni osnov. Zakon je usvojen u prvom čitanju u Predstavničkom domu, 12.1.2010. Istakla je da se u obrazloženju može vidjeti da je za Bosnu i Hercegovinu ovaj zakon jako bitan te da je to jedan od zahtjeva za priključenje Svjetskoj trgovinskoj organizaciji.

Uvodno obrazloženje dala je Snežana Akulović, savjetnik direktora u Upravi BiH za zaštitu zdravlja bilja. Rekla je da je, prema zahtjevima Svjetske trgovinske organizacije, potrebno pravnim aktima zaštititi intelektualnu svojinu, te da je zaštita novih sorti bilja, u stvari, zaštita intelektualne svojine. Naglasila je da se zaštitom intelektualne svojine stvara cjelovit sistem zaštite prava, potreban za organiziran nastup na tržištu i uključenje u Svjetsku trgovinsku organizaciju i EU. Istakla je da je ovaj zakon usklađen s konvencijom Unije za zaštitu novih sorti bilja kao i sa Sporazumom o trgovinskim aspektima prava intelektualne svojine u okviru Svjetske trgovinske organizacije.

Dalje je napomenula da je BiH imala Zakon o zaštiti novih sorti, ali da je Vijeće Unije za zaštitu novih sorti bilja zaključilo da je potrebno većinu članova revidirati radi usklađivanja s Konvencijom Unije, a što je jedan od zahtjeva za priključenje Svjetskoj trgovinskoj organizaciji. Nakon toga je formirana radna grupa i urađen je nacrt novog zakona, koji je sada potpuno usklađen s pomenutim međunarodnim aktima.

*Nakon obrazloženja predstavnika predlagača, pristupilo se glasanju, te je Komisija jednoglasno podržala principe Prijedloga zakona o zaštiti novih sorti bilja u Bosni i Hercegovini.*

Za izvjestioca na sjednici Doma naroda imenovana je Alma Čolo, predsjedavajuća Komisije.

**Ad. 4. Razmatranje Prijedloga zakona o izmjenama i dopunama Zakona o politici direktnih stranih ulaganja u Bosni i Hercegovini (prva komisijska faza), predlagač: Vijeće ministara BiH**

Predsjedavajuća Komisije dala je uvodno obrazloženje i naglasila da se radi o prvoj komisijskoj fazi i da je predlagač zakona Vijeće ministara BiH. Ustavnopravna komisija razmatrala je Prijedlog zakona i ocijenila da postoji ustavnopravni osnov. Predstavnički dom usvojio je zakon u prvom čitanju na nastavku 69. sjednice, održane 12.1.2010. Podsjetila je prisutne na mišljenje Direkcije za evropske integracije iz kojeg proizilazi da je usvajanje izmjena i dopuna Zakona o politici direktnih stranih ulaganja u BiH u skladu s mjerama za realizaciju kratkoročnog prioriteta evropskog partnerstva koje se odnose na jačanje pravne pouzdanosti za lokalne i strane privredne subjekte i unapređenje poslovnog okruženja. Međutim, prema mišljenju Direkcije za evropske integracije, materija koja se uređuje Prijedlogom zakona nije regulirana pravno obavezujućim aktima Evropske unije, te se iz tog razloga nije moguće referirati na sekundarne izvore prava i dati ocjenu usklađenosti s pravnom tečevinom EU.

Zehra Selimović, stručni savjetnik u Odsjeku za strana ulaganja u Ministarstvu vanjske trgovine i ekonomskih odnosa BiH, dala je uvodno obrazloženje za Prijedlog zakona o izmjenama i dopunama Zakona o politici direktnih stranih ulaganja u Bosni i Hercegovini. U svom izlaganju istakla je da je izradi Prijedloga zakona prethodio pilot-projekat o procjeni efekata primjene regulative koji je urađen u saradnji sa Svjetskom bankom u decembru 2007. godine. U Ministarstvu vanjske trgovine i ekonomskih odnosa BiH došlo se do zaključka da prethodna saglasnost koja se davala u Ministarstvu u postupku registracije direktnih stranih investicija predstavlja klasičnu administrativnu barijeru, da to produžava postupak registracije i da je u velikom broju slučajeva bila i razlog zašto su strani ulagači odustajali. Ministarstvo je predložilo zaključak da se pristupi izmjenama postojećeg zakona, koji je usvojen i u Vijeću ministara BiH.

Dalje je rekla da je ovim prijedlogom predviđeno da se strana ulaganja registriraju na nadležnim registarskim sudovima uz obavezu da se Ministarstvo redovno izvještava, kako bi imalo tačnu informaciju o stranim ulaganjima u BiH. U početku bi to bilo dostavljanje ovjerene kopije izvoda iz sudskog registra. Kasnije bi se te informacije razmjenjivale putem softvera kojim bi Ministarstvo bilo povezano sa sudovima. Na taj način bi Ministarstvo imalo tačne informacije koliko je društava registrirano, da li je uložen taj novac koji je već predviđen osnivačkim aktom i sl. Izradu softvera trebalo bi da finansira Svjetska banka. Kao negativan primjer iz dosadašnje prakse navela je da se dešavalo da u protokolu Ministarstva stoji oko 200 nepodignutih rješenja a vode se kao da su registrirani. Dodala je da je ranijim zakonom bila predviđena restrikcija kada se radi o ulaganjima u određene djelatnosti. Između ostalog, to je bilo naoružanje i vojna oprema. Tada strano ulaganje nije moglo preći 49% od ukupnog kapitala društva. Ovim zakonom, a na prijedlog resornih entitetskih ministarstava, ostavljena je mogućnost da vlade entiteta, ako to ocijene opravdanim, mogu taj procenat povećati i preko 49%.

Adem Ibrahimpašić pitao je kako će se evidentirati strano ulaganje kupovinom dionica. Naveo je primjer kako će Ministarstvo znati da je neko kupio sto posto dionica nekog preduzeća.

Zehra Selimović je u odgovoru istakla da se u tom slučaju promjena prvo upiše u Registar vredonosih papira a potom i u sudski registar. Adem Ibrahimpašić istakao je da smatra da nema upisa u sudski registar jer nema potrebe da se strani kupac registrira u sudu da bi kupio dionice domaće firme. Dodao je da smatra da tu postoji jedna praznina.

Alma Čolo osvrnula se na član 5. koji je, prema zakonu iz 1998. godine, propisivao da strani ulagači u BiH moraju registrirati svoja pojedinačna ulaganja istovremeno kod nadležnog organa države i kod nadležnog organa u odgovarajućem entitetu. U 2003. je taj

član izmijenjen tako da strani ulagači u BiH moraju registrirati svoja pojedinačna ulaganja kod nadležnog organa države. Međutim, dodala je da se sada predlaže da se to prenese na entitete te da se tvrdi da je to, u stvari, radi administrativnih barijera koje strani ulagači imaju. Istakla je da nije sigurna da je to baš tako i da sumnja da je ovo rješenje koje je predloženo korektno. Podsjetila je na kraju na mogućnost da se u drugoj komisijskoj fazi amandmanima djeluje na zakon.

Branko Zrno konstatirao je da je ovo što je ponuđeno kao izmjena i dopuna isključivo u funkciji efikasnijih procedura, jer je Zakon kakav je do sada bio sam po sebi u određenim odredbama postao smetnja. Naveo je primjere da se poslovi registracije u Kanadi završavaju za tri dana a u Evropi maksimalno za 15 dana, dok su ti rokovi kod nas još uvijek 60 dana.

*Nakon provedene rasprave, članovi Komisije su, s tri glasa "za", jednim "suzdržanim" i jednim glasom "protiv", usvojili principe predloženog zakona.*

Za izvjestioca na sjednici Doma naroda imenovana je Alma Čolo, predsjedavajuća Komisije.

#### **Ad. 5. Davanje saglasnosti za ratificiranje Revidiranog dopunskog sporazuma o Pružanju tehničke pomoći od strane Međunarodne organizacije za atomsku energiju ( IAEA) Bosni i Hercegovini**

Predsjedavajuća Komisije konstatirala je da je za ovaj dopunski sporazum nadležno Ministarstvo civilnih poslova BiH, te je dala riječ predstavniku nadležnog ministarstva.

Draženka Malićbegović, pomoćnik ministra civilnih poslova BiH, dala je uvodno obrazloženje. Rekla je da BiH kao članica Međunarodne agencije za atomsku energiju u više navrata od visokih zvaničnika IAEA bila upozoravana da se zaključi Dopunski sporazum o pružanju tehničke pomoći od strane Međunarodne agencije za atomsku energiju. S tim ciljem Ministarstvo civilnih poslova BiH, u koordinaciji s entitetskim ministarstvima zdravlja i Odjelom za zdravstvo Brčko Distrikta BiH, pokrenulo je inicijativu i Dopunski sporazum prihvatili su Vijeće ministara BiH i Predsjedništvo BiH, na 54. sjednici, održanoj 17. marta. Ministar civilnih poslova BiH potpisao je Dopunski sporazum a u ime IAEA gosp. Mohamed El Baradej. Istakla je da je s vanjskopolitičkog stanovišta opravdano prihvatanje Dopunskog sporazuma, te da je njegova ratifikacija prihvatljiva.

*Nakon izlaganja predstavnika nadležnog ministarstva, članovi Komisije jednoglasno su odlučili predložiti Domu naroda davanje saglasnosti za ratifikaciju:*

- *Revidiranog dopunskog sporazuma o pružanju tehničke pomoći od strane Međunarodne organizacije za atomsku energiju (IAEA) Bosni i Hercegovini.*

#### **Ad.6. Davanje saglasnosti za ratificiranje Sporazuma između Vijeća ministara Bosne i Hercegovine i Vlade savezne Republike Njemačke o finansijskoj saradnji u 2008. godini**

Predsjedavajuća je konstatirala da sjednici ne prisustvuje predstavnik Ministarstva finansija i trezora BiH kao nadležnog ministarstva. Međutim, predložila je članovima Komisije da se ipak izjasne o ovom međunarodnom sporazumu. *Članovi Komisije su se saglasili i jednoglasno odlučili predložiti Domu naroda davanje saglasnosti za ratifikaciju:*

- *Sporazuma između Vijeća ministara Bosne i Hercegovine i Vlade savezne Republike Njemačke o finansijskoj saradnji u 2008. godini*

(Nakon glasanja, predstavnik nadležnog ministarstva Miroljub Krunić, pomoćnik ministra finansija i trezora BiH, stigao je na sjednicu, ali su članovi Komisije smatrali da nema potrebe da se uključuje u raspravu.)

#### **Ad.7. Davanje saglasnosti za ratificiranje Šestog dodatnog protokola na Ustav Svjetskog poštanskog saveza**

Senada Čengić, viši stručni saradnik za pošte u Ministarstva komunikacija i prometa BiH, dala je uvodno obrazloženje. Naglasila je da se radi o zaostaloj obavezi BiH, koju je ona kao članica Svjetskog poštanskog saveza obavezna izvršiti. Naglasila je da BiH na sjednici Kongresa koji se održava svake četiri godine ima svoju delegaciju. Na kongresima se donose određene izmjene i dopune, nove odredbe tih akata itd. Kasnije se pristupa njihovoj ratifikaciji. Istakla je da su to obavezujući akti.

Dodala je da će BiH, osim ovog Šestog dodatnog protokola, imati još akata s posljednjeg Kongresa 2008. godine, a da je ratificiranje Šestog dodatnog protokola obaveza na koju je BiH upozorena iz Međunarodnog ureda i da je njegovo ratificiranje jako važno za razvoj poštanskog tržišta u Bosni i Hercegovini.

*Nakon izlaganja predstavnika nadležnog ministarstva, članovi Komisije jednoglasno su odlučili predložiti Domu naroda davanje saglasnosti za ratifikaciju:*

- *Šestog dodatnog protokola na Ustav Svjetskog poštanskog saveza.*

#### **Ad.8. Razmatranje informacija Ministarstva vanjskih poslova BiH:**

- **Samit Evropske unije – Lisabonski sporazum – kraća analiza;**
- **Analiza stavova nekih država članica NATO-a o ulasku Bosne i Hercegovine u Akcioni plan za članstvo u NATO (MAP);**
- **Pismo generalnog sekretara NATO-a Andersa Fogha Rasmunssena;**
- **Ažurirani pregled ratificiranja Sporazuma o stabilizaciji i pridruživanju sa BiH.**



Edin Šehić, šef odsjeka u Ministarstvu vanjskih poslova BiH, rekao je da je, kada je u pitanju ratificiranje Sporazuma o stabilizaciji i pridruživanju, u međuvremenu završena procedura i u Parlamentu Poljske. Reкао je da će za dva mjeseca biti završene tehničke stvari do potpisa predsjednika države, tako da će i ta zemlja relativno brzo okončati svoju proceduru. Ukratko je uporedio status ratifikacije Crne Gore i Bosne i Hercegovine i rekao da su vrlo slični. Ostalo je da Sporazum ratificiraju zemlje koje tradicionalno imaju dugotrajan postupak ratifikacije svih ugovora. Dodao je da generalno u postupku ratifikacije od članica EU nema nikakvih opstrukcija i da sve ide regularno.

Alija Muminović, šef odsjeka u Ministarstvu vanjskih poslova BiH, rekao je da će, što se tiče dobivanja MAP statusa pri NATO-u, to pitanje biti ponovo aktuelizirano u maju i o tome Ministarstvo vanjskih poslova BiH vodi računa u smislu praćenja ispunjenja preostalih obaveza iz MAP-a.

Alma Čolo istakla je da je pozicija BiH dosta dobra, kada je u pitanju ratifikacija Sporazuma o stabilizaciji i pridruživanju, jer ga već 20-ta zemlja ratificira, te da je ostalo još sedam zemalja EU, s tim što će BiH imati ozbiljan problem, a to je poštivanje Evropske konvencije o ljudskim pravima koje proizilazi iz Sporazuma o stabilizaciji i pridruživanju, jer Sporazum možemo dovesti u pitanje ukoliko ne ispoštujemo presudu Evropskog suda za ljudska prava.

*Nakon izlaganja predstavnika Ministarstva vanjskih poslova BiH, članovi Komisije primili su k znanju informacije Ministarstva vanjskih poslova BiH.*

#### **Ad.9. Razmatranje izvještaja o međunarodnim aktivnostima komisija i parlamentarnih delegacija PSBiH:**

- **Izvještaj Delegacije PSBiH u Vijeću Evrope o učešću na sastanku Komiteta za kulturu, nauku i obrazovanje Parlamentarne skupštine Vijeća Evrope, Pariz, 8.12.2009.**
- **Izvještaj Delegacije PSBiH u Parlamentarnoj skupštini NATO-a s 55. godišnje konferencije Parlamentarne skupštine NATO-a, Edinburg, od 13. do 17.11.2009.**

*Članovi Komisije jednoglasno su usvojili Izvještaj Delegacije PSBiH u Vijeću Evrope o učešću na sastanku Komiteta za kulturu, nauku i obrazovanje Parlamentarne skupštine Vijeća Evrope, Pariz, 8.12.2009., i Izvještaj Delegacije PSBiH u Parlamentarnoj skupštini NATO-a s 55. godišnje konferencije Parlamentarne skupštine NATO-a, Edinburg, od 13. do 17.11.2009.*

**Ad.10. Razmatranje Prijedloga izvještaja o radu Komisije za vanjsku i trgovinsku politiku, carine, saobraćaj i komunikacije Doma naroda PSBiH za 2009. godinu**

*Članovi Komisije jednoglasno su usvojili Prijedlog izvještaja o radu Komisije za vanjsku i trgovinsku politiku, carine, saobraćaj i komunikacije Doma naroda PSBiH za 2009. godinu.*

**Ad.11. Tekuća pitanja:**

- **Informacija Upravnog odbora Radio-televizije BiH o promjenama u poslovođstvu BHRT-a**

*Članovi Komisije primili su k znanju Informaciju Upravnog odbora Radio-televizije BiH o promjenama u poslovođstvu BHRT-a.*

Sjednica je završena u 15 sati.

Sekretar Komisije  
za vanjsku i trgovinsku politiku,  
carine, saobraćaj i komunikacije  
Nenad Pandurević

Predsjedavajuća Komisije  
za vanjsku i trgovinsku politiku,  
carine, saobraćaj i komunikacije  
Alma Čolo